

I. DISPOSICIÓN XERAIS

MINISTERIO DA PRESIDENCIA

- 4484** Orde PRE/647/2014, do 25 de abril, pola que se modifica a Instrución técnica complementaria número 2, «Requisitos esenciais de seguridade de artificios pirotécnicos, outros artigos pirotécnicos e dispositivos de ignición», do Regulamento de artigos pirotécnicos e cartucharía, aprobado polo Real decreto 563/2010, do 7 de maio.

O 12 de xuño de 2013, o Parlamento Europeo e o Consello aprobaron a Directiva 2013/29/UE, sobre a harmonización das lexislacións dos Estados membros en materia de comercialización de artigos pirotécnicos, que modifica de forma substancial a Directiva 2007/23/CE do Parlamento Europeo e do Consello, do 23 de maio de 2007, sobre a posta no mercado de artigos pirotécnicos, e adaptaron a súa redacción aos preceptos da Decisión n.º 768/2008/CE do Parlamento Europeo e do Consello, do 9 de xullo de 2008, sobre un marco común para a comercialización dos produtos, que establece principios comúns e disposicións de referencia aplicables a toda a lexislación sectorial, co fin de establecer unha base coherente para a elaboración, revisión ou refundición da dita lexislación.

Mediante o Real decreto 563/2010, do 7 de maio, polo que se aproba o Regulamento de artigos pirotécnicos e cartucharía, modificado polo Real decreto 1335/2012, do 21 de setembro, incorporouse ao noso ordenamento xurídico a Directiva 2007/23/CE. O regulamento consta de 205 artigos e complétase con vinte e seis instrucións técnicas complementarias e seis especificacións técnicas de desenvolvemento. A súa instrución técnica complementaria número 2, relativa aos «Requisitos esenciais de seguranza de artificios pirotécnicos, outros artigos pirotécnicos e dispositivos de ignición», ten como obxecto establecer os requisitos esenciais de seguranza que deben cumprir tanto os artificios de pirotecnia, outros artigos pirotécnicos e os dispositivos de ignición, con carácter previo á súa posta no mercado.

Algúns artigos pirotécnicos, en particular os artigos pirotécnicos para vehículos, como os xeradores de gas utilizados nos airbags, conteñen pequenas cantidades de substancias explosivas comerciais e explosivos militares. Tras a adopción da Directiva 2007/23/CE e da súa incorporación aos ordenamentos xurídicos dos Estados membros, da aplicación do disposto na normativa aprobada resultou a evidencia de que non ía ser posible substituír estas substancias como aditivos en composicións estritamente comburentes, nas cales se usan para potenciar o equilibrio enerxético.

Por isto, o requisito esencial de seguranza, que restrinxe o uso de substancias explosivas comerciais e explosivos militares, modificouse na referida Directiva 2013/29/UE.

A presente orde incorpora ao ordenamento xurídico español o disposto no punto 4 do anexo I da Directiva 2013/29/UE mediante a actualización do número 2.4 da Instrución técnica complementaria número 2, «Requisitos esenciais de seguranza de artificios pirotécnicos, outros artigos pirotécnicos e dispositivos de ignición», do Regulamento de artigos pirotécnicos e cartucharía, aprobado polo Real decreto 563/2010, do 7 de maio. A isto engádese unha modificación, no número 2.5.A 1) a) iii), para substituír «trono de pólvora negra» por «petardo», e «trono detonante» por «petardo de lampo» seguindo a terminoloxía das normas europeas harmonizadas.

A disposición derradeira terceira do Regulamento de artigos pirotécnicos e cartucharía, aprobado polo Real decreto 563/2010, do 7 de maio, habilita o Ministerio da Presidencia, por proposta dos ministros de Industria, Turismo e Comercio e do Interior, para a actualización dos contidos técnicos das instrucións técnicas complementarias e especificacións técnicas do dito regulamento.

Sobre esta orde emitiu informe favorable a Comisión Interministerial Permanente de Armas e Explosivos.

Na súa virtude, por proposta dos ministros de Industria, Enerxía e Turismo e do Interior, de acordo co Consello de Estado, dispoño:

Artigo único. *Modificación da Instrución técnica complementaria número 2, «Requisitos esenciais de seguranza de artificios pirotécnicos, outros artigos pirotécnicos e dispositivos de ignición», do Regulamento de artigos pirotécnicos e cartuchería, aprobado polo Real decreto 563/2010, do 7 de maio.*

A Instrución técnica complementaria número 2, «Requisitos esenciais de seguranza de artificios pirotécnicos, outros artigos pirotécnicos e dispositivos de ignición», do Regulamento de artigos pirotécnicos e cartuchería, aprobado polo Real decreto 563/2010, do 7 de maio, modifícase como segue:

Un. O número 2.4 queda redactado do seguinte modo:

«4. Os artigos pirotécnicos non conterán explosivos detonantes que non sexan pólvora negra ou composición detonante, salvo os artigos das categorías P1, P2 ou T2 e os artificios de pirotecnia da categoría F4 que cumpran as seguintes condicións:

- a) O explosivo detonante non se poderá extraer facilmente do artigo.
- b) No caso da categoría P1, o artigo non poderá funcionar con efecto detonante nin poderá, polo seu deseño e fabricación, iniciar explosivos secundarios.
- c) No caso das categorías F4, T2 e P2, o artigo non estará deseñado para funcionar con efecto detonante nin destinado a facelo ou, se está deseñado para detonar, non poderá, polo seu deseño e fabricación, iniciar explosivos secundarios.»

Dous. O número 2.5.A 1) a) iii) queda redactado da maneira seguinte:

«iii) A categoría 1 non incluírá petardos, baterías de petardos, petardos de lampo nin baterías de petardos de lampo».

Disposición derradeira primeira. *Incorporación de normas do dereito da Unión Europea.*

Mediante esta orde incorpórase ao ordenamento xurídico español o punto 4 do anexo I da Directiva 2013/29/UE do Parlamento Europeo e do Consello, do 12 de xuño de 2013, que modifica a Directiva 2007/23/CE do Parlamento Europeo e do Consello, do 23 de maio de 2007, sobre a posta no mercado de artigos pirotécnicos.

Disposición derradeira segunda. *Título competencial.*

A presente orde dítase ao abeiro do artigo 149.1.26.^a da Constitución, que establece a competencia exclusiva do Estado sobre o réxime de produción, comercio, tenza e uso de armas e explosivos.

Disposición derradeira terceira. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 25 de abril de 2014.—A vicepresidenta do Goberno e ministra da Presidencia, Soraya Sáenz de Santamaría Antón.